

HEADLINES:-

- 1 रक्षा मंत्री ते बीजेपी दे वरिष्ठ नेता राजनाथ सिंह होरें देशवासिएं गी अज्ज एह जकीन दोआया ऐ जे मुख्य दे बन्ने पूरी चाल्ली सुरक्षत न।
- 2 सुरक्षाबलें बारामुला जिले दे उड़ी सेक्टर च कब्जा रेखा पर पाकिस्तानी आतंकवादिएं दी घुसपैठ दी कोशश गी नाकाम करदे होई दऊं घुसपैठिएं गी मारी मकाया-थेआर, असलाह ते गोला बरूद बी बरामद कीता गोआ।
- 3 इस बारी दे लोकसभा चुनाएं च 12 राज्यें च मर्दे दे मकाबले महिला मतदाताएं दी गिनतरी मती ऐ। 47 करोड़ शा मती महिलां इस बारी दे आम चुनाएं च वोट पाने दे अपने हक्क दा इस्तेमाल करगंन।
- 4 बीजेपी अज्ज अपना 45मां स्थापना दिवस मना करदी ऐ। जे.पी.नड्डा, नरेन्द्र मोदी, अमित शाह ते पार्टी दे वरिष्ठ नेताएं पार्टी वकर्रे गी इस ध्याड़े पर मुबारकबाद दित्ती ऐ।

<><><><><><>

Rajnath Campaign

रक्षा मंत्री ते बीजेपी दे वरिष्ठ नेता राजनाथ सिंह होरें देशवासिएं गी एह जकीन दोआया ऐ जे मुख्य दे बन्ने पूरी चाल्ली सुरक्षत न। मध्यप्रदेश दे सिंगरौली च इक जनसभा दरान अज्ज भाषण दिंदे होई उनें आक्खेआ जे कांग्रेस दी हकूमत दरान कुसै ना कुसै राज्य च आतंकवादी घटना पेश औंदियां हियां पर उंदी सरकार नै इनेंगी तगड़ेयाई कन्ने रोकी दित्ता ऐ। विपक्ष पर जबानी हमला करदे होई राजनाथ सिंह होरें आक्खेआ जे कांग्रेस ते ओह्दी गठबंधन पार्टिएं दे नेताएं लोकें गी भड़काने ते नफरत फैलाने दा कम्म कीता ऐ। उनें आक्खेआ जे बीजेपी कर्दे बी धर्म जां जाति दी बिनाह पर फर्कोफर्की नेई करदी। उनें आक्खेआ जे मध्यप्रदेश दी डबल इंजन सरकार देसै दी तरक्की च महत्वै आली भूमका नभाई सकदी ऐ। उनें आक्खेआ जेगर तुस जनसंघ दे समें कोला उंदा घोषणा पत्र दिक्खगे तां एह पता लगगोग जे बीजेपी नै जो किश बी आक्खेआ, उसी करिये बी दस्सेआ ऐ। इक राष्ट्र इक चुनां दे हक्क च बोलदे होई उनें आक्खेआ जे उंदी पार्टी दा मन्नना ऐ जे एह्दे कन्ने देश मजबूत होग। राजनाथ सिंह होरें आक्खेआ जे इस बवस्था कन्ने लोक अपने वोट दा बेहतर इस्तेमाल करी सकगंन।

<><><><><><>

Infiltration-JK

बारामुला जिले दी उड़ी सेक्टर च कल सुरक्षा बलें कब्जा रेखा कोल आतंकवादिएं आस्सेआ घुसपैठ दी इक कोशश गी नाकाम करी दित्ता। श्रीनगर च रक्षा प्रवक्ता मूजब खुफिया अर्जेसिएं गी इस बारे केई सुचना हासल होई दियां हियां। अभियान दरान दऊं आतंकवादी गी मारी दित्ता गोआ। उंदे कब्जे थमां दो ए.के. रैफलां, त्रै मैगजीनां, चार हत्थगोले ते होर दूआ असलाह बरामद होआ।

<><><><><><>

Rajouri Search Operation

फौज दे जुआनें राजौरी जिले दे इक ग्रां च अपने कैप दे नेड़े अज्ज बडलै मुंह-न्हरे संदिग्ध नकलो-हरकत दिक्खियै किश गोलियां चलाइयां ते फही इलाके च तपाशी अभियान बी रंभेआ। सूत्रें मूजब द्रहाल इलाके दे सरोथा मोड़ा ग्रां च इस गोलीबारी दरान कुसै दे मारे जाने दी रिपोर्ट नेई ऐ। सूत्रें दस्सेआ जे फौजी कैप दे संतरी नै किश संदिग्ध लोकें गी कैप बक्खी औंदा दिक्खियै किश राउंद गोलियां दागियां। जेह्दे परैत संदिग्ध लोकें दा एह समूह नेड़े दे ग्रां बक्खी नस्सी गोआ। अधिकारिएं दस्सेआ जे फौज नै एह्दे मगरा इलाके च तपाशी अभियान रंभेआ पर खीरी रिपोर्ट थहोने तोड़ी कुसै बी संदिग्ध बारे किश पता नेई लग्गे दा हा। अधिकारिएं मूजब सुरक्षाबलें अज्ज बडलै शाहदरा शरीफ इलाके च बी तपाशी अभियान चलाया ऐ पर कुसै गी बी गिरफ्तार नेई कीता गोआ ऐ।

<><><><><><>

JK-PSA

राष्ट्र बरोधी तत्वे कन्नै सख्ती नै पेश आँदे होई बारामुला जिले दी पुलस नै जन सुरक्षा कनून पीएसए तैहत अधिकारिएं थमां औपचारिक आदेश थहोने परैत दऊं जनें गी हिरासतै च लैता ऐ। इनें दौनें गी उधमपुर दी जिला जेल च रक्खेआ गोआ ऐ। पुलसै नै दस्सेआ ऐ जे उंदे खलाफ राष्ट्र बरोध गतिविधिऐं गी लेइयै केई मामले दर्ज कीते गेदे न।

<><><><><><>

Jaishankar-LAOS

विदेश मंत्री डॉ. एस.जयशंकर होरें अज्ज आक्खेआ जे 17 भारती कम्मगार जेहड़े लाओस च असुरक्षत ते गैर कनूनी कम्मं दे झांसे च फसी गेदे हे, ओह वापस भारत परतोआ करदे न। इक सोशल मीडिया पोस्ट उप्पर डॉ. जयशंकर होरें लाओस च भारती दूतावास ते उत्थुं दे अधिकारिएं दा उंदे सैहयोग लेई धन्नबाद कीता।

<><><><><><>

Congress List

कांग्रेस नै आँदे लोकसभा चुनाएं आस्तै 6 मेदवारें दी सूचि जारी कीती ऐ। पार्टी नै उत्तरी गोवा हल्के थमां रमाकांत खालप उगी दक्खनी गोवा हल्के थमां कैप्टन विरियोटो फर्नांडिस गी मेदान च तुआरेआ ऐ। सत्यपाल सिंह सिकारवर मध्यप्रदेश दे मोरेना थमां ते प्रवीण पाथल ग्वालियर हल्के थमां चुनां लडगंन।

<><><><><><>

Election 2024

भारत दा जीवंत लोकतंत्र वोट पाने दे अधिकार दे मामले च पूरी दुनिया गी बत्त दस्सने आला रेया ऐ। उआं चुनावी भागीदारी च लैंगिक बरोबरी दी यात्रा शानदार ते चुनौतिएं कन्नै भरोची दी दौनें चाल्ली दी रेही ऐ। सन् 1952 च होए दे मुख् दे पैहले आम चुनाएं च तकरीबन 80 लक्ख महिलां मतदाता अपनी पंछान दा ब्यौरा नेई देई सकियां हियां। उस बेल्ले चुनां आयोग गी इक अनोखी समस्या दा सामना करना पेआ हा। केई महिलाएं अपने परोआर दे मद्रें दे नाएं पर अपना पंजीकरण करोआया हा जेहड़ा उस बेल्ले दे समाज दी गतिशीलता गी दर्शादा हा। मजूदा दौर च एह सिंति मती हदै तोड़ी बदली गेदी ऐ। 2019 दे लोकसभा चुनाएं च रिकार्ड 67.18 फीसदी महिलाएं मतदान कीता जेहड़ा समाजी मानदंडें ते जागरूकता च इक महत्वपूर्ण तब्दीली दा प्रतीक ऐ। 2009 दे बाद चुनावी भागीदारी च लैंगिक बित्थ गी पंछान होई चुनां आयोग नै स्वीप अभियान रंभेआ हा। आदिवासी जिलें च महिला मतदार रैलिएं दे आयोजन थमां लेइयै जम्मू कश्मीर च मद्र इंडिया अभियान शुरू करने तगर मतदाताएं गी शामिल करने ते जागरूक बनाने लेई लोडचदी रणनीति लागू कीती गई। इस बरे दे लोकसभा चुनाएं च एह तब्दीली साफ नजरी आवै करदी ऐ की जे 12 राज्यें च मद्रें दे मकाबले महिला मतदाताएं दी गिनतरी मती ऐ ते एह भारत दी लोकतांत्रिक यात्रा च इक मील दा पत्थर ऐ। इस बारी दे लोकसभा चुनाएं च 47 करोड़ शा मती महिलां वोट पाने दे अपने हक्क दा इस्तेमाल करने लेई तैआर न।

<><><><><><>

Polling Training-Udhampur(byte)

2024 लोकसभा चुनाएं गी रमानदारी कन्नै कराने आस्तै उधमपुर दे डिप्टी जिला चुनां अधिकारी डॉ. अनिरुद राय होरें दुए चुनां अधिकारिएं कन्नै महिलाएं दे गौरमैट डिग्री कालेज च अज्ज चुनां सिखलाई सत्र च हिस्सा लैता। इस मौके उनें सिखलाई प्रोग्राम च हिस्सा लैने दे महत्व उप्पर जोर दित्ता तां जे मतदान केन्द्रें च सुचारू ढंगै कन्नै मतदान होई सकै। उनें आक्खेआ.....

<><><><><><>

Election Training-Poonch(byte)

पुंछ दे चुनां विभाग नै अज्ज संसदी चुनाएं दी चुनां सिखलाई दे दुए गेड़ गी मुकम्मल करी लैता। पुंछ दे चुनां विभाग आस्सेआ कर्मचारिएं गी मतदान दी महत्वपूर्ण प्रक्रिया च हिस्सा लैने लेई तैआर करने आस्तै व्यापक सिखलाई प्रोग्राम कराया जा'रदा ऐ। मतदान दरान लोकवाद गी जकीनी बनाने लेई विभाग आस्सेआ कोई कसर नेई छोड़ी जा'रदी। साढ़े संवाददाता कन्नै गल्ल करदे होई जिला नोडल अधिकारी फतेह मोहममद अब्बासी होरें आक्खेआ.....बाईट

<><><><><><>

BJP-Foundation Day

बीजेपी दे वरिष्ठ नेता ते प्रधानमंत्री नरेन्द्र मोदी होरें होर दुए वरिष्ठ बीजेपी वरिष्ठ लीडरें, अमित शाह ते जे.पी.नड्डा हुंदे कन्नै बीजेपी दे सब्बने कार्यकर्ताएं गी पार्टी दे 45में स्थापना दिवस उप्पर शुभकामनां दित्तियां न। अज्ज इक सोशल मीडिया पोस्ट उप्पर मोदी होरें कार्यकर्ताएं दा उंदी मेहनत ते बलिदान आस्तै धन्नबाद कीता जेह्दी बदौलत पार्टी नै केइए बरें दे संघर्ष दे बाद एह थाहर हासल कीती ऐ। उनें आक्खेआ जे पाटी गी एनडीए दा अन्नत्रुट्ट हिस्सा होने दा मान ऐ। ताई अमित शाह होरें बी पार्टी कार्यकर्ताएं दा पार्टी गी दुनिया दी सारें कोला बड्डी पार्टी बनाने लेई धन्नबाद कीता। जे.पी.नड्डा होरें संघर्ष च शामल पार्टी दे वरिष्ठ नेताएं गी श्रद्धांजलि भेंट कीती।

<><><><><><>

Chug Foundation(byte)

बीजेपी दे राष्ट्री महासचिव तरुण चुग होरें इस गल्लै गी पक्का कीता ऐ जे उंदी पार्टी आतंकवाद गी बिंद बी बर्दाश्त नेई करने आली नीति गी लेइयै वचनबद्ध ऐ। उनें आक्खेआ जे मोदी हुंदी अगुवाई आली सरकार इस गल्लै गी जकीनी बना करदी ऐ जे बक्ख-बक्ख समुदायें बश्कार कुसै किस्मै दा धुवीकरण नेई होऐ। बीजेपी दे स्थापना दिवस पर जम्मू च संवाददाता सम्मेलन गी संबोधत करदे होई उनें आक्खेआ.....बाईट

<><><><><><>

Raina BJP-FD(byte)

भारती जनता पार्टी दे स्थापना दिवस दे मौके उप्पर अज्ज जम्मू च बी केई कार्यक्रमें दा सरिस्ता कीता गेआ। जम्मू कश्मीर बीजेपी इकाई दे अध्यक्ष रविन्द्र रैणा हुंदी अगुवाई च पार्टी सदर दफतर त्रिकुटा नगर जम्मू च पार्टी दा झंडा चाढ़ेआ गेआ। रैणा होरें जमीनी सतह उप्पर तनदेही कन्नै कम्म करने आले पार्टी कार्यकर्ताएं दी सराहना कीती। उनें राष्ट्र दी रक्षा लेई बलिदान देने आले सैनिकें गी श्रद्धांजलि बी भेंट कीती। पार्टी कारजकर्ताएं बडे उत्साह ते जोश कन्नै बक्ख-बक्ख कार्यक्रमें च हिस्सा लैता। इस मौके उनें आक्खेआ.....बाईट

<><><><><><>